



## 2. Tschanteda dal cussagl cumünel in marcudli, ils 4.2.2015 a las 19.00 in chesa cumünela S-chanf

**Presidi:** Duri Campell

**Preschaints:** Gian Andrea Bott, Paolo Bernasconi, Jnes Barblan, Liun Quadri

**Absaints:**

**Actuar:** Duri Schwenninger

---

### Tractandas:

1. Protocol
2. 7.900 Plan da quartier „Resgia Chapella“, preschantaziun stüdis da variantas tres il planiseder cumünel e decisiun da princip
3. 0.211 Dumandas da fabrica
4. 4.010 Consultaziun revisiun parziela ledscha per la chüra d'amalos
5. 8.300 Tscherna prüm lavuraint/instructur da giarsuns
6. 8.000 Pros cumünels parcella nr. 752, decisiun regard surdeda / cuntinuaziun fitteda
7. 2.100 Scoula primara, surdeda furniziun 4 laptops
8. 2.100 Pagina da web scoula e scoulina, surdeda lavur
9. 8.300 Pista da schlisuler / senda d'inviern via Griatschouls, decisiun regard la spüerta e surdeda lavur da fer pista
10. 9.999 Varia

La glista da tractandas vain approveda sainza objecziuns.

**Protocol:** Il protocol da la tschanteda dals 14.01.2015 vain approvu unanimamaing.

### **10 7.900 Planisaziun dal territori cumünel Plan da quartier „Resgia Chapella“, preschantaziun stüdis da variantas tres il planiseder cumünel e decisiun da princip**

Per quista tractanda es preschaint il planiseder cumünel, Orlando Menghini. El preschainta 4 stüdis da variantas regard la furmaziun dal quartier „Resgia Chapella“. Zieva animeda discussiun e zieva chi sun gnidas dedas tuot las spiegaziuns necessarias tres il planiseder, decida il cussagl per la varianta cun lascher ils 2 edificis existents e 13 parcelas per surfabricher cun üna cifra d'utilisaziun d'arduond 0,6. Scu prossem pass dess il planiseder elavurer in detagl il plan da quartier sün la basa da la varianta decisa.

**11 4.400 Fliamaint**  
**Consultaziun revisiun parziela ledscha per la chüra d'amalos**

Il cussagl piglia cugnuschentscha da las actas regard la revisiun parziela da la ledscha per la chüra d'amalos. In concordanza cul princip da la politica da sandet "ambulant aunz il staziunar" es gnieu formulo i'l model directiv pertucho „d'attempo dal Grischun 2012“ la seguainta finamira strategica: per cumpenser la meglioraziun da las cundiziuns generelas per l'abiter chüro stu la prescripziun oriunda, chi prevezza cha las vschinaunchas e cha'l chantun haun da pajer contribuziuns d'investiziun per eriger lets da chüra stazioners in chesas da personas attempedas e da chüra scu eir in gruppas da chüra tenor l'art. 21 LTM, gnir abolida. Il cussagl repassa il formular electronic chi'd es gnieu miss a disposiziun dal chantun e decida da fer las seguaintas propostas: las contribuziuns per novs lets da chüra in chesas da fliamaint d'esser gnir mantgnidas inavaunt e resguardand il trattamaint eguel dess esser la taxa fundamentela listessa per personas taunt in chesas da fliamaint scu in chesas cun l'abiter chüro.

**12 0.212 Persunel**  
**Tscherna prüm lavuraint/instructur da giarsuns**

Sün la publicaziun da la piazza libra sun entredas 4 annunzchas. Zieva chi haun gieu lö ils discuers da preschantaziun s'haun retrats ils duos candidats chi d'eiran illa schelta stretta. Resguardand l'intenziun d'occupar la piazza a lungia vista decida il cussagl da na tscherner ün candidat, dimpersè da publicar da nouv la piazza libra.

**13 8.000 Agricultura**  
**Pros cumünels parcella nr. 752, decisiun regard surdeda / cuntinuaziun fitteda**

Regula Krüger-Fontana ho do aint la desditta pels pros cumünels sün parcella nr. 752 a Chapella. Siand ch'ün da quels pros gniva cultivo tres Schimun Meng, que chi d'eira eir manzuno i'l contrat agricul oriunt, es previs da surlascher la fitteda da tuots 2 pros a Schimun Meng. Zieva animeda discussiun decida il cussagl cun 3 cunter 1 vusch da surder la fitteda da tuots duos pros sün parcella nr. 752 a Schimun Meng e da desister da publicar la fitteda. Duri Campell s'ho absanto per quista tractanda.

**14 2.100 Scoula primara**  
**Scoula primara, surdeda furniziun 4 laptops**

Per acquirer la 2. e l'ultima part dals laptops per la scoula primara s'ho trat aint offertas da la firma Ricoh chi chüra il sistem d'informatica da nossa vschinauncha. Zieva cuorta discussiun decid'il cussagl unanimamaing da surder la furniziun e la lavur da configuraziun dals 4 laptops a la firma Ricoh pel predscho offert da fr. 6'240.00.

**15 2.100 Scoula primara**  
**Pagina da web scoula e scoulina, surdeda lavur**

Per moderniser la pagina d'internet da la scoula s'ho decis, our da motivs economics, d'integrer quella in la pagina da la vschinauncha in fuorma d'ün modul. Ils cuosts per quella lavur muntan a fr. 3'790.00, impü ils cuosts annuels per modificaziuns ill'otezza da fr. 567.00. Resguardand l'import previs i'l preventiv decida il cussagl unanimamaing da surder la lavur a la firma Innovativ Web da Wilen chi ho erret eir la pagina da la vschinauncha pel predscho offert.

**16 8.300 Turissem e cura**  
**Pista da schlisuler / senda d'inviern via Griatschouls, decisiun**  
**reguard la spüerta e surdeda lavur da fer pista**

La via da God God vers Griatschouls füss d'inviern adatteda per cumbiner il spassager ed il schlisuler sün ün lung traget. In quel conex ho Curdin Joos inoltro üna proposta concreta ed ün'offerta per fer pront il traget da schlisuler. Siand cha a S-charf mauncha üna simila spüerta per schlisuler sün ün lung traget es il cussagl da l'avis da spordscher quist an a partir da dalum quel traget a prova. Il cussagl decida da surder a Curdin Joos l'incumbenza da preparar la pista pel predschi offert da fr. 160.00 per ura. Il silvicultur ho l'incumbenza da decider cur chi vain fat la pista zieva chi ho do naiv, scu chi vain praticcho tar las sendas d'inviern.

**17 9.999 Varia**

Il president orientescha, cha la Regenza grischuna ho approvo la revaisa parziela dals tschantamaints chi'd es gnieu adatto in connex cun l'approvaziun da la revaisa totela da la ledscha da scoula scu eir l'aggiunta da l'iniziativa e la cumpetenza da la radunanza cumünela da decider regard trattativas da collavuraziuns e fusiuns cun otras vschinaunchas, artichel 15 alinea 5.

Il depüto orientescha, cha'l cussagl da scoula ho elavuro ün regulativ per las scolaziuns ed ils perfecziunamaints da la magistraglia.

A las 22.40 vain la tschanteda alveda.

In buna fè

L'actuar:  
**D. Schwenninger**